

Umat Islam diseru tingkatkan ilmu supaya tidak terpinggir

UM 26 SEP 2001

KUANTAN 25 Sept. — Umat Islam perlu meningkatkan ilmu pengetahuan agar mereka tidak menjadi masyarakat terpinggir yang mudah diperkotak-katikkan oleh kuasa asing.

Menteri Di Jabatan Perdana Menteri, Datuk Abdul Hamid Zainal Abidin berkata, penekanan untuk menuntut ilmu itu amat penting di dalam Islam dan dengan sebab itulah kitab al-Quran diturunkan.

“Umat Islam perlu menanamkan budaya ‘iqra’ dengan mendalami ilmu-ilmu yang terkandung di dalam al-Quran,” katanya ketika berucap mewakili Perdana Menteri, Datuk Seri Dr. Mahathir Mohamad pada majlis perasmian Majlis Tilawah Al-Quran Peringkat Kebangsaan di sini, malam ini.

Majlis itu turut dihadiri oleh Menteri Besar, Datuk Seri Adnan Yaakob, Menteri Perpaduan Negara dan Pembangunan Masyarakat, Datuk Dr. Siti Zaharah Sulaiman serta ahli-ahli Exco kerajaan negeri yang lain.

Abdul Hamid berkata, kepentingan menuntut ilmu sentiasa ditekankan di dalam Islam sehinggakan mereka yang mempunyai pengetahuan tinggi diberikan kemuliaan.

Katanya, dengan penerapan budaya menuntut ilmu, negara akan dapat menyediakan golongan belia yang sentiasa mampu menghadapi cabaran dari dalam dan luar negara.

“Pengetahuan merupakan asas kepada kemajuan sesuatu bangsa dan ini ditekankan di dalam ajaran Islam.

“Umat Islam sepatutnya berada di tengah-tengah paksi kemanusiaan dan bukan sekadar duduk di pinggiran,” katanya.

Sementara itu, dalam majlis tilawah yang bermula malam ini, dua qari dan seorang qariah memperdengarkan bacaan masing-masing.

Qari nertama ialah Othman Azumi Ahmad dah Kedah yang membaca surah al-Insan ayat pertama juzuk ke-29.

Beliau diikuti oleh qariah dari Wilayah Persekutuan, Che Aminah Che Awang yang membaca surah al-Baqarah ayat 107 juzuk pertama.

Sementara qari terakhir, Aziz Mustakim dari Johor memperdengarkan bacaannya dari surah Yunus ayat 90 juzuk ke-11.